

Na osnovu tačke j) stava 1. člana 32a. Ustava Srednjobosanskog kantona ("Službene novine Srednjobosanskog kantona", broj: 1/97, 5/97, 6/97, 2/98, 7/98 – ispravka teksta, 8/98, 10/2000, 8/03, 2/04 i 14/04), donosim

U K A Z
O PROGLAŠENJU ZAKONA
O ORGANIZOVANJU I DJELOKRUGU
KANTONALNIH MINISTARSTAVA
I DRUGIH TIJELA KANTONALNE UPRAVE
SREDNJOBOSANSKOG KANTONA

Proglašavam Zakon o organizovanju i djelokrugu kantonalnih ministarstava i drugih tijela kantonalne uprave Srednjobosanskog kantona, koji je donijela Skupština Srednjobosanskog kantona na XVIII. sjednici održanoj 30. oktobra 2012. godine.

Broj: 01-02-532/12 PREDSDJEDAVAJUĆI SKUPŠTINE
2. novembra 2012.
Travnik Josip Kvasina, s. r.

473

Z A K O N
O ORGANIZOVANJU I DJELOKRUGU
KANTONALNIH MINISTARSTAVA
I DRUGIH TIJELA KANTONALNE UPRAVE
SREDNJOBOSANSKOG KANTONA

I. OSNOVNE ODREDBE

Član 1.

**(Osnivanje kantonalnih organa uprave
i kantonalnih upravnih organizacija)**

Ovim zakonom osnivaju se organi uprave i upravne organizacije Srednjobosanskog kantona (u daljnjem tekstu: Kanton) te se utvrđuje njihov djelokrug i uređuju druga pitanja značajna za njihovo organizovanje i funkcionisanje.

Član 2.

(Organi koji obavljaju poslove uprave)

Poslove uprave u okviru nadležnosti Kantona obavljaju kantonalna ministarstva, kantonalne uprave i kantonalne upravne organizacije, predviđeni ovim zakonom.

Član 3.

(Zastupljenost)

(1) U kantonalnim ministarstvima, kantonalnim upravama i kantonalnim upravnim organizacijama osigurava se proporcionalna zastupljenost konstitutivnih naroda i grupe ostali,

u skladu s Amandmanom XIII. (na član 4.) Ustava Srednjobosanskog kantona, kao i ravnopravna zastupljenost spolova.

(2) Gramatička terminologija upotrebe muškoga roda u ovom zakonu podrazumijeva uključivanje obaju rodova.

II. KANTONALNI ORGANI UPRAVE I KANTONALNE UPRAVNE ORGANIZACIJE

A. Kantonalna ministarstva

Član 4.

(Kantonalna ministarstva)

Kantonalna ministarstva su:

- a) Ministarstvo unutrašnjih poslova;
- b) Ministarstvo pravosuđa i uprave;
- c) Ministarstvo finansija;
- d) Ministarstvo privrede;
- e) Ministarstvo poljoprivrede, vodoprivrede i šumarstva;
- f) Ministarstvo prostornog uređenja, građenja, zaštite okoliša, povratka i stambenih poslova;
- g) Ministarstvo zdravstva i socijalne politike;
- h) Ministarstvo obrazovanja, nauke, kulture i sporta.

B. Djelokrug kantonalnih ministarstava

Član 5.

(Ministarstvo unutrašnjih poslova)

Ministarstvo unutrašnjih poslova obavlja upravne, stručne i druge poslove utvrđene zakonom koji se odnose na ostvarivanje nadležnosti Kantona u oblasti unutrašnjih poslova, i to: zaštitu ustavnoga poretka i sprečavanje ugrožavanja toga poretka te sigurnosti Federacije Bosne i Hercegovine i Kantona; zaštitu života i imovine te drugih prava i sloboda građana; sprečavanje i otkrivanje krivičnih djela organizovanoga kriminala i terorizma; stavljanje u promet opojnih droga i druga krivična djela; pronalaženje i hvatanje počinitelaca krivičnih djela i njihovo privođenje nadležnim organima; kriminalističko-tehničko vještačenje; osiguranje određenih lica i zgrada Kantona; poslove u oblasti proizvodnje, prometa i skladištenja eksplozivnih, zapaljivih i ostalih opasnih materija; sigurnost, kontrolu i regulisanje saobraćaja na putevima; nabavljanje, držanje i nošenje oružja i municije; održavanje javnoga reda i mira; održavanje javnih skupova; poslove u vezi s agencijama za zaštitu ljudi i imovine te unutrašnje službe zaštite; poslove kontrole kretanja naoružanja i vojne opreme u Kantonu; promjenu ličnog imena te naknadne upise i ispravke podataka u matičnim knjigama; nadzor nad vođenjem matičnih knjiga; prebivalište i boravište građana; lične karte i JMB; registrovanje motornih vozila; vozačke dozvole; putne isprave; poslove u vezi s državljanstvom; organizovanje, naoružavanje, opremanje, osposobljavanje i usavršavanje policije; poslove sistema veze i kriptozastite Ministarstva unutrašnjih poslova; školovanje, stručno osposobljavanje i usavršavanje kadrova za potrebe organa unutrašnjih poslova; pružanje pomoći radi otklanjanja posljedica u slučaju opće opasnosti prouzrokovane elementarnim nepogodama i epidemijama; inspekcijski nadzor u zaštiti od požara i eksplozija, te obavlja i druge poslove utvrđene zakonom.

Član 6.

(Ministarstvo pravosuđa i uprave)

Ministarstvo pravosuđa i uprave obavlja upravne, stručne i druge poslove utvrđene zakonom koji se odnose na ostvarivanje nadležnosti Kantona u oblasti: pravosuđa, pravobranilaštva, uprave i lokalne samouprave; notarske službe; upravne inspekcije; davanja mišljenja o usklađenosti zakona i drugih propisa koje donose Skupština Srednjobosanskog kantona, Vlada Srednjobosanskog kantona i rukovodioci državne službe sa evropskom Konvencijom o zaštiti ljudskih prava i osnovnih sloboda, kao i drugim instrumentima za zaštitu ljudskih prava koji imaju pravnu snagu ustavnih odredbi, te obavlja i ostale upravne poslove koji ne spadaju u djelokrug drugog organa uprave Kantona i druge poslove utvrđene zakonom.

Član 7.

(Ministarstvo finansija)

Ministarstvo finansija obavlja upravne, stručne i druge poslove utvrđene zakonom koji se odnose na ostvarivanje nadležnosti Kantona u oblasti finansija i budžetske revizije, i to: izradu i izvršenje Budžeta Srednjobosanskog kantona (u daljnjem tekstu: Budžet Kantona) i izradu godišnjih obračuna Budžeta Kantona; nadzor nad izvršavanjem Budžeta Kantona; trezorsko poslovanje; obračunski sistem (računovodstvo, knjigovodstvo i bilans); sistem osiguranja imovine i lica; sistem taksa; porezni sistem; sistem finansiranja javne potrošnje; upravljanje novčanim tokovima; dnevno praćenje novčanih sredstava; obaveze i potraživanja te utvrđivanje dinamike praćenja i planiranja osiguranja nedostajućih sredstava; koncentraciju finansijskih sredstava radi osiguranja finansijskoga tržišta; javni dug i njegovo servisiranje; kontrolu ostvarivanja Budžeta Kantona, te obavlja i druge poslove utvrđene zakonom.

Član 8.

(Ministarstvo privrede)

Ministarstvo privrede obavlja upravne, stručne i druge poslove utvrđene zakonom koji se odnose na ostvarivanje nadležnosti Kantona u oblasti privrede, i to: industrije, svih grana, osim prehrambene industrije; praćenja razvoja savremenih tehnika i tehnologija te predlaganja mjera u svrhu usaglašavanja razvoja sa strategijama razvoja; aktivnosti na poticajima razvoja privrede; promovisanja mjesta i uloge akreditiranja i certificiranja usklađenosti sa Bosanskohercegovačkim standardima (BAS-om); priprema privrednih subjekata za pristupne i predpristupne fondove Evropske unije (IPA-fondove) te pomoć u tome; obrta; poduzetništva; rada i radnih odnosa; zapošljavanja; zaštite na radu; rudarstva; geoloških istraživanja; energije (energetske efikasnost, obnovljivih izvora energije i kogeneracije, upravljanje energijom i energetske bilansi); praćenja privređivanja privrednih subjekata; koordiniranja i provođenja projekata značajnih za Kanton u nadležnosti Ministarstva privrede; korištenja prirodnih bogatstava iz nadležnosti Ministarstva privrede; cestovnoga saobraćaja i komunikacija; uređivanje uvjeta, načina i organizovanja obavljanja prijevoza putnika i tereta na području Kantona te uređivanja taksiprijevoza; korištenja prirodnih bogatstava u oblasti turizma i turističkih resursa Kantona, kao i ugostiteljstva i trgovine; praćenja i donošenja mjera radi neposredne kontrole cijena i zaštite potrošača, te obavlja i druge poslove utvrđene zakonom.

Član 9.

(Ministarstvo poljoprivrede, vodoprivrede i šumarstva)

(1) Ministarstvo poljoprivrede, vodoprivrede i šumarstva obavlja upravne, stručne i druge poslove utvrđene zakonom koji se odnose na ostvarivanje nadležnosti Kantona u oblasti poljoprivrede, i to: zaštitu i korištenje poljoprivrednoga zemljišta, te zaštitu poljoprivrednoga bilja i poljoprivrednih proizvoda od uzročnika bolesti, štetočina i korova; u oblasti prehrambene industrije, i to: proizvodnju i promet sjemena i sadnog materijala; u oblasti veterinarstva, i to: proizvodnju i unapređenje stočarstva; zdravstvenu zaštitu životinja;

kontrolu zdravstvene ispravnosti sirovoga mesa, ribe, mlijeka i jaja te stočne hrane; u oblasti vodoprivrede, i to: vodne izvore, planove, osnove i bilanse voda; zahvaćanje i korištenje voda; osiguranje voda za potrebe vodosnabdijevanja stanovništva i industrije; u oblasti šumarstva, i to: unapređenje proizvodnje u šumarstvu; uzgoj, zaštitu, uređivanje i unapređivanje šuma; stanje drvnoga fonda; eksploataciju šuma; pošumljavanje degradiranih i izdanačkih šuma te goleti i krša; lovstvo i lovnu prirodu; te obavlja i druge poslove utvrđene zakonom.

(2) U sastavu Ministarstva poljoprivrede, vodoprivrede i šumarstva je Kantonalna uprava za šumarstvo.

(3) Kantonalna uprava za šumarstvo obavlja određene upravne i stručne poslove utvrđene zakonom koji se odnose na ostvarivanje nadležnosti Kantona.

Član 10.

(Ministarstvo prostornog uređenja, građenja, zaštite okoliša, povratka i stambenih poslova)

Ministarstvo prostornog uređenja, građenja, zaštite okoliša, povratka i stambenih poslova obavlja upravne, stručne i druge poslove utvrđene zakonom koji se odnose na ostvarivanje nadležnosti Kantona, i to: planiranje i uređenje prostora te politiku korištenja zemljišta; izradu i provođenje prostornoga plana i njegovo usklađivanje s Prostornim planom Federacije Bosne i Hercegovine; građenje; zaštitu okoliša (upravljanje otpadom, zaštitu prirode i kvaliteta zraka te zaštitu od buke); povratak i realiziranje projekata obnove i razvoja; utvrđivanje stambene politike i osiguranje harmoniziranoga funkcionisanja lokalne samouprave u komunalnoj djelatnosti, te obavlja i druge poslove utvrđene zakonom.

Član 11.

(Ministarstvo zdravstva i socijalne politike)

Ministarstvo zdravstva i socijalne politike obavlja upravne, stručne i druge poslove utvrđene zakonom koji se odnose na ostvarivanje nadležnosti Kantona u oblasti zdravstva i socijalne politike, i to: provođenje politike i strategije zdravstva u cjelini; razvoj i unapređenje sistema zdravstvene zaštite i zdravstvenog osiguranja; izradu programa razvoja zdravstvene djelatnosti te donošenje planova i programa mjera zdravstvene zaštite; koordiniranje i implementiranje projekata u oblasti zdravstva značajnih za Kanton a s ciljem rekonstrukcije i obnove zdravstvenoga sistema; učestvovanje u implementiranju informatičkih projekata u oblasti zdravstva; osiguranje dostupnosti djelatovnim, sigurnim i kvalitetnim lijekovima te sprečavanje njihove zloupotrebe; socijalnu sigurnost i solidarnost; staranje o porodicama s djecom, staranje o djeci i odraslim osobama ometenim u duševnom ili tjelesnom razvoju; staranje o starim osobama bez porodičnog staranja; zaštitu civilnih žrtava rata; zaštitu porodica; usvojenje, starateljstvo i socijalnu zaštitu, te obavlja i druge poslove utvrđene zakonom.

Član 12.

(Ministarstvo obrazovanja, nauke kulture i sporta)

Ministarstvo obrazovanja, nauke, kulture i sporta obavlja upravne, stručne i druge poslove utvrđene zakonom koji se odnose na ostvarivanje nadležnosti Kantona u oblasti obrazovanja, nauke, kulture i sporta, i to: sistem predškolskog odgoja, osnovnoškolskog i srednjoškolskog odgoja i obrazovanja te visokog obrazovanja; naučnoistraživačke djelatnosti i naučnotehničke informacije i komunikacije; razvoj i unapređenje sporta i tjelesne kulture te bavljenje sportom i tjelesnom kulturom; razvoj i unapređenje kulture, kulturnog i umjetničkog stvaralaštva, kulturnoga života i kulturnih djelatnosti te javnog informisanja; provođenje i organizovanje polaganja vozačkog ispita; kontrolu nad provođenjem propisa o osposobljavanju kandidata za

vozača motornih vozila; inspekcijski i stručno-pedagoški nadzor; vođenje registara; učestvovanje u pripremi programa i projekata te provođenje projekata iz programa Evropske unije i ostalih oblika međunarodne pomoći, te obavlja i druge poslove utvrđene zakonom.

C. Samostalne kantonalne uprave

Član 13.

(Samostalne kantonalne uprave)

Samostalne kantonalne uprave su:

- a) Kantonalna uprava za inspekcijske poslove;
- b) Kantonalna uprava za braniocce;
- c) Kantonalna uprava za civilnu zaštitu;
- d) Kantonalna uprava za geodetske i imovinskopravne poslove.

Član 14.

(Kantonalna uprava za inspekcijske poslove)

(1) Kantonalna uprava za inspekcijske poslove obavlja inspekcijske poslove iz nadležnosti kantonalnih inspekcija koje su organizovane u njenom sastavu te druge upravne i stručne poslove, u skladu sa zakonom.

(2) Kantonalne inspekcije u sastavu Kantonalne uprave za inspekcijske poslove su:

- a) Tržišno-turistička inspekcija (Tržišna inspekcija i Turističko-ugostiteljska inspekcija);
- b) Sanitarno-zdravstveno-farmaceutska inspekcija;
- c) Inspekcija rada (Inspekcija rada, Inspekcija zaštite na radu i Inspekcija socijalne zaštite);
- d) Urbanističko-ekološka inspekcija (Urbanističko-građevinska inspekcija, Inspekcija zaštite okoliša, Inspekcija zaštite prirode);
- e) Saobraćajna inspekcija (Inspekcija putnoga saobraćaja i Inspekcija za puteve);
- f) Poljoprivredna inspekcija;
- g) Šumarsko-lovna inspekcija;
- h) Vodna inspekcija;
- i) Veterinarska inspekcija;
- j) Tehnička inspekcija (Elektroenergetska inspekcija, Termoenergetska inspekcija i Rudarsko-geološka inspekcija).

Član 15.

(Kantonalna uprava za braniocce)

Kantonalna uprava za braniocce obavlja određene upravne, stručne i druge poslove utvrđene zakonom koji se odnose na ostvarivanje nadležnosti Kantona u oblasti: zaštite branilaca, dobrovoljaca i organizatora otpora, veterana, učesnika Odbrambeno-oslobodilačkog rata, ratnih vojnih invalida, mirnodopskih vojnih invalida, šehidskih porodica i porodica poginulih, umrlih i nestalih branilaca i nosilaca najviših ratnih priznanja, ratnih vojnih zarobljenika i učesnika Narodnooslobodilačkog antifašističkog rata 1941.–1945. godine; vođenja i podržavanja aktivnosti na očuvanju tekovina Odbrambeno-oslobodilačkog rata 1992.–1995. godine; ostvarivanja dopunskih prava branilaca; izgradnje, uređenja i održavanja spomen-obilježja i grobalja boraca; održavanja manifestacija i drugih sličnih projekata, te obavlja i druge poslove utvrđene zakonom.

Član 16.

(Kantonalna uprava za civilnu zaštitu)

Kantonalna uprava za civilnu zaštitu obavlja određene upravne i stručne poslove utvrđene zakonom koji se odnose na ostvarivanje nadležnosti Kantona u oblasti zaštite i spašavanja te inspekcije civilne zaštite, i to: organizovanje, pripremu i praćenje funkcionisanja zaštite i

spašavanja na području Kantona; izradu procjene ugroženosti za područje Kantona; pripremanje programa razvoja zaštite i spašavanja od prirodnih i drugih nesreća u Kantonu; predlaganje plana zaštite od prirodnih i drugih nesreća u Kantonu; praćenje stanja priprema zaštite i spašavanja te predlaganja mjera za unapređenje organizovanja i osposobljavanja civilne zaštite Kantona i općina; organizovanje i praćenje realizovanja obuke nosilaca civilne zaštite; organizovanje i koordiniranje provođenja mjera zaštite i spašavanja te organizovanje i provođenje poslova zaštite od požara i vatrogastva; organizovanje Kantonalnog operativnog centra civilne zaštite te osiguravanje njegova rada; predlaganje programa zajedničkih i samostalnih vježbi i izradu elaborata za izvođenje vježbi pripadnika civilne zaštite, organa uprave, privrednih društava i drugih pravnih lica iz oblasti zaštite i spašavanja; predlaganje i preduzimanje mjera za popunu ljudstvom Kantonalnog štaba civilne zaštite, jedinica civilne zaštite i službi za zaštitu i spašavanje, te njihovo opremanje materijalno-tehničkim sredstvima; pripremanje propisa u oblasti zaštite i spašavanja iz nadležnosti Kantona; organizovanje i provođenje obuke stanovništva te pružanje pomoći općinskim službama za civilnu zaštitu u obavljanju poslova iz njihove nadležnosti; obavljanje inspekcijskoga nadzora iz oblasti zaštite i spašavanja, zaštite od požara te vatrogastva; vođenje propisane evidencije; te obavlja i druge poslove zaštite i spašavanja u skladu sa zakonom.

Član 17.

(Kantonalna uprava za geodetske i imovinskopravne poslove)

Kantonalna uprava za geodetske i imovinskopravne poslove obavlja određene upravne i stručne poslove utvrđene zakonom koji se odnose na ostvarivanje nadležnosti Kantona u oblasti: premjera te uspostave i obnove katastra nekretnina; premjera te uspostave i obnove katastra komunalnih uređaja; registra prostornih jedinica; kartografisanja područja Kantona; baze podataka katastra nekretnina; komasacije zemljišta; inspekcijskoga nadzora geodetskih poslova i u geodetskim obrtima; imovinskopravnih i drugih stvarnopravnih odnosa na nekretninama i pravima na nekretnine, te obavlja i druge poslove utvrđene zakonom.

III. SAMOSTALNE KANTONALNE UPRAVNE ORGANIZACIJE

A. Vrste samostalnih upravnih organizacija

Član 18.

(Samostalne kantonalne upravne organizacije)

(1) Samostalne kantonalne upravne organizacije su:

- a) Kantonalni arhiv;
- b) Kantonalni zavod za urbanizam, prostorno planiranje i zaštitu kulturno-historijskoga naslijeđa.

(2) Samostalne kantonalne upravne organizacije imaju svojstvo pravnoga lica.

Član 19.

(Kantonalni arhiv)

Kantonalni arhiv obavlja određene stručne i druge poslove koji pretežno zahtijevaju primjenu stručnih i naučnih metoda rada te s njima povezane upravne poslove utvrđene zakonom koji se odnose na ostvarivanje nadležnosti Kantona u oblasti: evidentiranja, preuzimanja, sređivanja, obrade, zaštite i korištenja ukupne arhivske građe i registraturnog materijala; razvoja arhivske djelatnosti u Kantonu; mjera osiguranja i zaštite arhivske građe; stručnoga nadzora nad zaštitom registraturnog materijala i arhivske građe te odabira arhivske građe iz

registraturnog materijala; naučnoistraživačkog i publicističkog rada u arhivskoj djelatnosti, te obavlja i druge poslove utvrđene zakonom.

Član 20.

**(Kantonalni zavod za urbanizam, prostorno planiranje
i zaštitu kulturno-historijskoga naslijeđa)**

Kantonalni zavod za urbanizam, prostorno planiranje i zaštitu kulturno-historijskoga naslijeđa obavlja određene stručne i druge poslove koji pretežno zahtijevaju primjenu stručnih i naučnih metoda rada te s njima povezane upravne poslove utvrđene zakonom koji se odnose na ostvarivanje nadležnosti Kantona u oblasti: planiranja, programiranja, projektovanja, korištenja, valorizacije i zaštite prostora te mjera za njihovo ostvarivanje; izrade prostorno-planske i urbanističko-tehničke dokumentacije, osim poslova koji su, u skladu sa zakonom, stavljeni u nadležnost Federacije Bosne i Hercegovine i općina; praćenja provođenja Prostornoga plana Srednjobosanskog kantona 2005. – 2025. i učešća u usaglašavanju s Prostornim planom Federacije Bosne i Hercegovine; uspostave i razvoja kantonalnog jedinstvenog geoinformacijskoga sistema (GIS-a); zaštite kulturno-historijskoga i prirodnoga naslijeđa; praćenja stanja u prostoru te učešća u izradi, usklađivanju i provođenju prostornih planova općina i Kantona, te obavlja i druge poslove utvrđene zakonom.

**IV. SJEDIŠTE KANTONALNIH ORGANA UPRAVE, KANTONALNIH UPRAVA I
KANTONALNIH UPRAVNIH ORGANIZACIJA**

Član 21.

**(Sjedište kantonalnih ministarstva,
kantonalnih uprava
i kantonalnih upravnih organizacija)**

(1) Sjedište kantonalnih ministarstva, kantonalnih uprava i kantonalnih upravnih organizacija je u Travniku.

(2) Iznimno od odredbe stava (1) ovoga člana, Kantonalna uprava za geodetske i imovinskopravne poslove i Kantonalni zavod za urbanizam, prostorno planiranje i zaštitu kulturno-historijskoga naslijeđa imaju sjedište u Bugojnu.

(3) Vlada Srednjobosanskog kantona može odlučiti da do četiri ministarstva, odnosno druga tijela kantonalne uprave mogu imati sjedište izvan Travnika.

**V. RUKOVOĐENJE KANTONALNIM ORGANIMA UPRAVE I KANTONALNIM
UPRAVNIM ORGANIZACIJAMA**

Član 22.

**(Rukovođenje kantonalnim ministarstvima,
kantonalnim upravama
i kantonalnim upravnim organizacijama)**

Kantonalnim ministarstvima, kantonalnim upravama i kantonalnim upravnim organizacijama rukovodi se na način predviđen federalnim zakonom koji reguliše organizovanje uprave.

Član 23.

(Unutrašnja organizacija)

(1) Unutrašnja organizacija kantonalnih ministarstava, kantonalnih uprava i kantonalnih upravnih organizacija utvrđuje se pravilnikom o unutrašnjoj organizaciji.

(2) Pravilnik o unutrašnjoj organizaciji izrađuje se i donosi na način predviđen zakonom iz člana 22. ovoga zakona i propisima koji se odnose na izradu i donošenje toga pravilnika.

VI. PRIJELAZNE I ZAVRŠNE ODREDBE

Član 24.

(Početak rada Kantonalne uprave za inspekcijske poslove)

- (1) Kantonalna uprava za inspekcijske poslove počinje s radom danom postavljenja direktora Kantonalne uprave.
- (2) Direktor Kantonalne uprave za inspekcijske poslove postavit će se u roku od tri mjeseca od dana stupanja na snagu ovoga zakona.
- (3) Direktor Kantonalne uprave za inspekcijske poslove dužan je donijeti pravilnik o unutrašnjoj organizaciji Kantonalne uprave za inspekcijske poslove u roku od 60 dana od dana postavljenja za direktora Kantonalne uprave.

Član 25.

(Preuzimanje inspekcijskih poslova)

Danom početka rada, a u skladu s djelokrugom utvrđenim ovim zakonom, Kantonalna uprava za inspekcijske poslove preuzima inspekcijske poslove koji su bili u djelokrugu kantonalnih ministarstava, i to:

a) Ministarstva privrede:

- 1) Elektroenergetske inspekcije,
- 2) Inspekcije postrojenja pod tlakom,
- 3) Rudarsko-geološke inspekcije,
- 4) Tržišne inspekcije,
- 5) Turističko-ugostiteljske inspekcije,
- 6) Inspekcije za putni saobraćaj,
- 7) Inspekcije za javne puteve,
- 8) Inspekcije rada,
- 9) Inspekcije zaštite na radu;

b) Ministarstva poljoprivrede, vodoprivrede i šumarstva:

- 1) Šumarske inspekcije,
- 2) Poljoprivredne inspekcije,
- 3) Veterinarske inspekcije,
- 4) Vodoprivredne inspekcije;

c) Ministarstva prostornog uređenja, građenja, zaštite okoliša, povratka i stambenih poslova:

- 1) Inspekcije za zaštitu okoliša,
- 2) Građevinske inspekcije;

d) Ministarstva zdravstva i socijalne politike:

- 1) Sanitarne inspekcije,
- 2) Farmaceutске inspekcije,
- 3) Zdravstvene inspekcije,
- 4) Inspekcije socijalne zaštite.

Član 26.

(Preuzimanje inspektora)

Kantonalna uprava za inspekcijske poslove, istovremeno s preuzimanjem poslova, preuzima glavne kantonalne inspektore i kantonalne inspektore koji se zateknu na poslovima u ministarstvima iz člana 25. ovoga zakona, kao i državne službenike i namještenike čiji je posao u neposrednoj vezi s inspekcijskim poslovima.

Član 27.

(Preuzimanje arhive)

Arhivu, dokumentaciju i sredstva rada inspekcija koje prelaze u sastav Kantonalne uprave za inspekcijske poslove preuzima Kantonalna uprava za inspekcijske poslove.

Član 28.

(Nastavak rada)

Do preuzimanja inspekcija u Kantonalnu upravu za inspekcijske poslove, postojeće kantonalne inspekcije iz člana 25. ovoga zakona nastavljaju raditi u okviru ministarstva u kojem su bile organizovane do dana početka rada Kantonalne uprave za inspekcijske poslove.

Član 29.

(Prestanak rada Kantonalne direkcije za puteve)

Početkom rada Javne ustanove Direkcija za puteve, prestaje s radom Kantonalna direkcija za puteve kao samostalna upravna organizacija.

Član 30.

(Preuzimanje zaposlenika i materijalnih sredstava)

Javna ustanova Direkcija za puteve preuzima poslove, zaposlenike, arhivu, dokumentaciju i sredstva rada te materijalna sredstva kantonalne upravne organizacije Kantonalna direkcija za puteve.

Član 31.

(Usklađivanje pravilnika o unutrašnjoj organizaciji)

U roku od 30 dana od dana stupanja na snagu ovoga zakona, rukovodioci kantonalnih organa uprave i kantonalnih upravnih organizacija dužni su uskladiti pravilnike o unutrašnjoj organizaciji tih organa, odnosno organizacija s djelokrugom utvrđenim ovim zakonom.

Član 32.

(Usklađivanje propisa)

Kantonalni zakoni i drugi kantonalni propisi uskladit će se s odredbama ovoga zakona u roku od 90 dana od dana stupanja na snagu ovoga zakona.

Član 33.

(Prestanak važenja)

Danom stupanja na snagu ovoga zakona prestaje važiti Zakon o kantonalnim ministarstvima i drugim tijelima kantonalne uprave Srednjobosanskog kantona ("Službene novine Srednjobosanskog kantona", broj: 8/03 – prečišćeni tekst i 14/03).

Član 34.

(Dan stupanja na snagu)

Ovaj zakon stupa na snagu osmoga dana od dana objavljivanja u "Službenim novinama Srednjobosanskog kantona".

Broj: 01-02-533/12 PREDSEDavajući SKUPŠTINE

2. novembra 2012.

Travnik Josip Kvasina, s. r.
